

慎餘書屋文集

卷五

所

慎餘書屋文集卷五

莆田陳池養著

清邑庠士東陽陳璞齋先生墓誌銘

公諱從龍字爲璉一字璞齋世居東陽明監察御史拙
齋公十二世孫於池養爲叔祖行祖右文郡增廣生父
世珍監生公少敦樸讀書之暇練習世務爲父所器任
以事善承志得其歡心習弓馬列邑庠一應鄉試不售
不復應席先人基業經理井井遇假貸不甚權子母或
數多許分還歸斬斷有以困告者陽拒而陰周之自奉

極嗇赴義甚勇如修先墓祖祠輯家乘建淳浦社洪源
寺填石礮皆捐重貲爲族人先事賴以成郡中建造凡
勸募無不樂從兄弟二人仲氏性豪邁揮金如泥蕩廢
先業屢戒不聽沒後爲之區處復舊從子鐘銘積學成
名子孫溫飽公之力也世之徵逐聲色計較錙銖者固
宜其偷薄倫紀乃從事詩書口談孝弟而家庭骨肉間
或有難言之隱公獨篤念天顯不古人風不誠賢乎哉
生乾隆戊辰年六月十六日卒道光丙戌年十一月十
七日無疾而終得年七十有九配林氏上平側林氏趙

氏男子四女子六孫男五曾孫男十二令公之子河清
孫光星鳳英奉公柩葬栖隱亭山麓坐子向午兼壬丙
鳳英以狀請銘池養知公最深竊謂公之德當世不得
而先也爲之銘曰安而敦富而穀篤倫彝守雍睦勇於
義冠吾族潛自修光煜煜水泉環山峯簇藏其真符厥

卜

例封恩騎尉橫塘張君墓誌銘

道光十六年七月十三日莆南橫塘耆宿張君卒余弔
其家其孤士俊士選士芳等將葬君於兆具事蹟丐銘

余諾其請君諱道祐字文有一字斐然系出唐秘書省
校書寶公後世居橫塘爲莆甲族祖尊三父江春兄弟
二君居長生乾隆戊辰年十月初八日得年八十有九
娶王次娶鄭俱先君卒舉丈夫子三長鵬程監生先君
卒次士俊邑庠生三士選嘉慶己卯科武舉四士芳孫
男八君少貧祖父初葬不利呼搶無以自容罄產買地
於寶勝楓宅與弟文忠枕由山上月餘而墳以成中年
習計然之術酌盈劑虛家日裕顧見義必爲內任修大
宗祠崇德祠外萬安社石廊宮其菩提寺則獨力爲之

邑中大興建捐助不吝以次令嗣士俊遊余門與余
道光六年南洋分鄉開溝余往來與士人謀多齟齬不
合橫塘一帶溝與地平功尤艱鉅慨然命其子率族黨
爲南洋先諸鄉互相倣效遂有成功東角鎮海隄由是
屹然而立君一倡之力也道光十二年莆苦饑余辦勸
糶君好義屢遇歉食指多財力亦稍薄矣慨然舉債買
雜糧以與鄉內貧乏者急於濟人如此葬壺公梅花山
黃宅埔之北坐向辛乙兼戌辰銘曰山如斗水如綬地
半畝梅花藪藏之厚昌厥後

交林郎揀選知縣林君墓誌銘

君林姓諱登梧字延中一字秋圃世居莆城北赤柱爲
邑甲族系出唐端州刺史葦公後故明三百年膺巍科
登顯仕濟濟也入

本朝二百年矣君猶以經學世其家幼承庭訓穎異好學
與兄桐門諱培梧君同筆硯攻經史爲文專精竭思夏
夏獨造墳簾迭唱莆中一時有軼轍之稱每學使者至
試輒冠其曹桐門君以嘉慶庚午舉於鄉君屢薦不售
桐門君歿君理其家井井有條寡嫂弱姪賴以不凍餒

道光乙未

恩科始舉於鄉年五十三矣是冬計偕入都歸家後建祠宇
祀祖父盛夏督工作以勞得疾卒不起去舉於鄉之年
三載耳其孤步九將葬君請文池養池養文不足傳而
不可以已也池養少受業君父敦泉師與君兄弟交厚
池養之入都領憑補官直隸也君兄桐門君正獲雋計
偕入都因與同行其次年池養由保定進京聞敦泉師
之訃哭於莆陽會館道光元年池養以外艱旋里與君
兄弟往復無間旣而桐門君歿則哭之益於君加厚焉

詎今日而又哭君耶桐門諸子及孫未能自立也君諸
子亦未能自立也君竟歿世耶嗚乎可痛也已君生乾
隆癸卯五月十二日卒道光丁酉十一月二十八日得
年五十有五曾祖飛揚庠生贈教諭祖元琛舉人將樂
學教諭父炳麟進士江西上猶知縣配刺桐巷黃氏繼
東里黃氏側黃氏先配黃氏側黃氏俱先君卒子二長
步九次沐女三孫男一葬下鄭狀元山之麓庚甲向墓
君所自相也銘曰君之學善文章晚乃遇姓名香山之
阿水一方葬得吉後其昌

孝廉方正吳徵君墓誌銘

徵君吳姓諱儒珍字彥國號訥人一號聘三先世由泉之黃龍遷大浯塘高祖威略將軍英公以軍功顯於

國朝康熙年間官四川提督時請

旨居莆之定莊爲莆人曾祖應鵬福建提標叅將祖一清四
川永甯副將父元樞乾隆庚子舉人初家世榮貴後貧
薄至君之父而貧甚遂以文學著名君幼承庭訓能自
砥礪爲城東門名孝廉鄭君遠芳所器妻以女俾在城
僦屋卒業後於耕濱居焉列邑庠食餼三舉優行應鄉

試七薦不售今

上登極之元年

詔直省舉孝廉方正邑紳士以君應舉大吏

聞於

朝得

旨召用一邑之人皆以爲不愧君善事父母喪母哀毀骨立
事庶母如適庶母生一女爲善嫁之待從兄弟如同胞
敬祖睦宗竭力任其事性恬淡絕鮮交遊獨厚遇

池養

蒲事廢墜每有興作與君謀必力贊其成以是仰君賢

亦愈感君之誼君生乾隆丙戌年十月初三日卒道光
乙巳年七月二十一日享年八十今距其歿六載矣將
葬君暨配鄭安人其次子齊泰長孫郡增廣生贊虞來
請銘義不得辭葬雲峯山之麓午子向銘曰成性存存
安而能敦藏之名山以蕃其子孫

清例贈修職佐郎學巷王君墓誌銘

君王姓諱瓊字允林一字瑩軒系出太原先代由固始
入閩居仙遊至宋而侍御史回公官于朝直聲聞天下
世居古瀨

國初遷學巷曾祖國棟監生祖掄元監生貤贈文林郎父
大訓監生舉男子五君其長也貧甚棄儒設肆鬻娶婦
旋卒母篤疾躬侍湯藥三年人稱其孝遭父喪哀毀骨
立家無儋石族黨多素封未嘗有求一切不與人校厥
子尙德聰穎令其受業胡蘭宣孝廉課督勉勵遂以成
名前後秉鐸省垣爲士林所仰君之教也生乾隆乙酉
卒道光丙午得年八十有二其孤將以今年月日葬君
請銘於余余耳君賢詢於邑之人皆稱長者殆潛德之
必彰者可無銘乎配孺人黃氏娶未久而卒繼配鄭孺

人生子尚德由廩生捐訓導署候官縣儒學教諭福州府儒學教授娶瀨洋張氏適吳氏孫男四孫女一葬某山之麓某向銘曰窮益堅砥廉隅篤行誼如醇儒古之人今所無石韞玉水懷珠自他有耀理非誣

清累貤贈恭人林氏生祖母楊太恭人墓誌銘

咸豐元年春三月河南開歸陳許兵備道林君揚祖函告池養將以夏五月日改葬生祖母楊太恭人於白沙東方山之麓句爲之銘池養不文不可以辭太恭人楊氏故國子監學錄累貤贈中憲大夫趣山先生之適室

趣山先生嫡配黃恭人無子娶太恭人生一子爲累贈
中憲大夫眷祚先生配翁恭人生觀察兄弟三人觀察
生三歲而趣山先生歿又四歲而眷祚先生亦歿二弟
繼殤太恭人與翁恭人姑媳相依共撫一孫以育以誨
觀察旣冠而有聲黌序爲經師授徒能盡師道於是鄉
里藉藉稱太恭人暨翁恭人之賢不置觀察以邑廩生
充道光乙酉拔貢生中本省鄉試第一己丑成進士觀
政刑部所居厚堦比舍不戒於火太恭人偕翁恭人泥
首籲天火越其門而過觀察請假歸省再入都 軍

機處行走

記名御史聞太恭人暮年得恙不能食

亟乞養歸旣歸而太恭人痊可如常逾月無疾而逝方
觀察之幼而孤也家門零落姑媳二人以十指所得贍
日用俾專志苦讀觀察旣貴而太恭人暨翁恭人儉約
如舊待人無疾言遽色尤其德之厚而爲戚里所稱也
太恭人初葬伏地虎祖山今改葬東方山離初葬里許
墓向乙辛兼卯酉其初葬也李鐵梅學使者實爲之銘
今池養道所聞之里閭者銘曰嗚乎坤德之敦兮藏於
白沙之原以昌其子孫

清誥贈奉政大夫例貢生戴君墓誌銘

君戴姓諱興祥字元科行三有本其別號也系出唐屯田員外郎洽公後由福州長溪入仙之香田里十九世明衛指揮里仁公遷文賢里至貴興公乃卜興賢里西苑居焉曾祖中山公祖太學生雲豐公父貤贈奉政大夫明德公世敦善行君少穎異讀書能知大義爲其師劉達士所器善事父母因家累舍舉子業就邑之西關外太平街少權子母初猶未裕偶道經科嶺下有陳姓者投身溪潭中援出之僅而得甦其妻追至詢由債迫